

# Envidia

Envidia i yalusí. Kiko ta e diferencia?

Yalusí tin dos banda. 1) E persona yalurs ta deseá loke bo tin. Bo tin un outo nobo...e tambe ta deseá un outo nobo. Bo tin sierto puesto...e ke un puesto similar. 2) E persona yalurs no ke pa bo haña loke e tin. E tin miedu di pèrdè loke e tin. Talbes un yònkuman ta papiando ku un yùfrou. Un dia e ta mira e yùfrou kombersá ku un otro yònkuman. E promé yònkuman ta bira yalurs riba esun di dos, ku miedu di pèrdè e yùfrou.

En kontraste, **un persona envidioso no ke pa bo tin loke bo tin. E ta deseá di kit'é for di bo djis pa bo no tin e mas. E hende aki tin un malisia kuné. E ta deseá malu pa esun ku tin algu.** E mes no ke loke bo tin, ma e no ke pa bo tin e tampoko.

Tin un fábula di dos hòmber envidioso i golos pa plaka ku tabata hasi un biahe na pia. Nan a topa un hòmber santu i a nan a biahe huntu te ora e santu mester a kohe un otro ruta. Ma promé ku el a bai, el a ofresé di duna e dos hòmber envidioso un regalo di despídida, bisando ku esun ku hasi petishon promé lo haña loke e ta pidi, i e otro lo haña dòbel.

Maske tur dos tabata sa loke nan ta deseá, nan no tabata ke pidi. Tur dos tabata ke haña dòbel i ningun di dos tabata ke pa e otro haña dòbel.

Desesperá, un hòmber a kohe e otro chok'é i demandá pa e pidi promé. “Ta bon,” el a bai di akuerdo. “Lo mi hasi mi petishon. Mi ta deseá ku mi por tin ún wowo siego.” Mes ora el a pèrdè bista den ún di su wowonan. I su kompañé a haña dòbel—dos wowo siego.

Esei ta típiko di envidia. **Un hende envidioso ta desea malu pa otro hende...** simpelmente pa motibu di un lógro òf poseshon di un otro persona, sea ta outo, kas, negoshi, sèn, popularidat, puesto, abilidadat, beyesa, amistad, famia, èts.

Envidia ta un kanser sumamente peligroso...asta na nos isla. Tantu krímen ta tuma lugá komo resultado di envidia! Tantu esfuerso ta hasí pa kibra hende ku a logra algu òf ku tin sierto meta ku nan ke alkansá! Tantu hende ta hasi bruha pa otro ku intenshon malisioso! Tantu hende ta lamta akusashon falsu kontra un persona, motivá pa envidia!

Pakiko e lidernan hudiu a laga krusifiká Hesus? Beibel ta kontestá: “...e (Pilato) *tabata sa ku nan (lidernan hudiu) a entregu'E (Hesus) pa motibu di envidia*” (Mateo 27:18; Marko 15:10). No a importá e nan ku Esun ku nan a kalumniá, maltratá, i ehekutá tabata **totalmente inosente**.

Hopi biaha esei ta e kaso. Un persona envidioso ta tan dominá pa e mònster maligno ku e ta kibra i destruí hende sin para ketu i pensa di e daño ku e ta kousa un persona inosente. Den e mente envidioso, e persona ta kulpabel simpelmente pasobra e tin algu ku e persona ku ta envidi'é no ke p'é tin. **E ta fungi tantu komo hues komo burdugu!**

Kiko ta Dios Su preskripshon pa envidia? Entre otro, Beibel ta bisa, “*Amor ta kariñoso i no ta yalurs...no ta buska su propio interes ...no ta regosihá den inhustisia...*” (1 Korintionan 13:4-6). E stimashon ku Dios ta duna ta kore ku di envidia. Un hende ku ta envidiá ta malkontentu ku e eksito di ún persona i ta kontentu pa e sufrimentu di un otro. Un hende ku ta stima ta kontentu pa e lógro di ún persona i ta pena ku e sufrimentu di otronan.

Skritura ta konta ku rei Saul a envidiá David, pasobra e tabata eksitoso, popular, i lo ta e siguiente rei. Konstant el a buska David pa mata. En kontraste, su yu, Jonatan, esun ku lo bira rei ora su tata muri, no a envidiá David. Dikon? Pasobra “*Jonatan tabata stima David*” (1 Samuel 18:1).

Bo por ta un persona religioso, deboto na bo iglesia. Ma si bo tin envidia den bo kurason, bo no konosé e amor di Dios. Un e eliminá e otro. Abo tin ku skohe: amor òf envidia.